



## Ślōnzok ze Papuji Nowyj Gwineji

Czas na Feryje...

Prawie po trzech rokach jezech nazod we dōma, czas przyszōł, że musioł zech ôpuscić PNG na trzy miesiōnce. We tym czasie chca ôdwydzic moja drogo familijo i przaciōł no i ôdpocznyć przed dalszōm robotōm a co bardzo wożne na wyrobiynie se nowyj wizy do PNG. Sama rajza minyła mi bez żodnych problymōw.

Z Port Moresby wyleciołzech do Singapuru, kaj zech czekoł na nastympny fliger do Doha i kaj do zabicio czasu godołzech z jednym Australijczykiym kery ôkazoł się już fest ôżarty. Miołzech ôkazjo do potrynowanio mojego angelskiygo a wyrzecie mi że ôżarty australijski akcynt ciynżko zrozumiyć. Potym już było nudno, w Doha ni mioł zech wiela czasu, bo roz dwa zech znalaz moja bramka, poczekoł zech chwila i już my wsiodali na Fliger do Warszawy.

Piyrsze spostrzerzynia po powrocie...

Jak tak patrza do zadku to Myśla, wiela rzeczy mie ôminyło, jak miejsca i ludzie sie pozmiyniali, ale i jak wiela jo zech sie zmiynił. Wiela ludzi godo mi jak zech sie zmiyniōł i że stoł zech sie wyinkszy. Wiym zech sie zmiyniył, ale mentalnie, bo sposōb myślynio i patrzynio na świat mōm terazki inszy jak i nawyki i przyzwyczajynia wyrobiył zech się insze.. Jak piza już ô nawykach to musza ôpowiedzieć, jak zech po tym dugim czasie jeżdżynio po lewej stronie drōgi wsiod do auta i jak zech wyjechoł z Ustronnej, to zaroz na lewo strōna. Dobrze że szwagier bōł przy mie to mi zwrōciył uwaga co jo robia. Ale nie mortwcie sie tukej, to bōło yno piyrwszego dnia, bo terazki już jeżdżą prawidłowo.

Jak człowiek wyjedzie na dugo i to w cołkiym insze ôd tukejszego miejsce to zauwažo szwarnota i we nowym miejscu jak i tukej. Pōnbōczek doł mi możność ôglądania piyknej dżungli i Papuaskich gōrōw ale jak zech je tukej, to tym bardzij docyniōm szwarnota naszymy przyrody, delikatność ziylyni i wōniani strōmōw i kwiotkōw kerych w Papui niy mōm.

I co terazki bydzie...

Dziynkuja Jezusowi za tyn czas urlopu kery mōm. Do września moga podładować akumulatory, by potym jeszcze bardzij sie zaangażować i wlyżć już w coś co znōm. Po przylocie nazot do PNG zostana w Port Moresby to je we stolicy, kaj byda mioł roztomajnte ôbowiōnzki. Przede wszyjskim przełożyni posyłajōm mie do roboty w tygodniku „Wantok”, kery je jedynym na świecie gazetōm w jynzyku „Tok Pisin”. Tejże gazecie ôprócz roboty na komputerach byda mōg i pisać. Ale nojważniyszo bydzie moja ôbecność i świadectwo mojj wiary wśrōd ludzi świeckich kerzy tam robiōm, i mōm nadzieja że Pōnbōczek wykorzysty mie jako swojy narzyndzi.

**Brat Szymon Porwoł**